

समा - 12:25 hrs.

<><><><><><>

National Mission

केन्द्रीय मंत्री डाक्टर जितेन्द्र सिंह होंरें आक्खेया ऐ जे जम्मू-कश्मीर, हिमाचल प्रदेश ते उत्तराखंड आले हिमालयायी खिते च बददल फट्टने दियें कुदरती क्रोपियें पर शोध लेई इक राष्ट्रीय मिशन खडेरया गया ऐ ते एदे राएं आम लोकें ते प्रशासन गी बी अगेत्रें गै चेतावनियां जारी करने च मदाद मिलोग। मीडिया कर्मियें गी सम्बोधित करदे होई डाक्टर सिंह होंरें आक्खेया जे बददल फट्टने जनेही कुदरती क्रोपियें दी स्टीक भविक्खवानी करना फिलहाल मुमकिन नैई ऐ, पर ए मिशन खतरे दी शेंका आले इलाकें दी शिनाख्त करने ते तौले चेतावनी जारी करने आली इक प्रणाली विकसित करने च पक्क गै मददगार साबित होग। विज्ञान ते ट्रैक्नोलजी सनें धरत विज्ञान सरबंधी मंत्रालय दी इस पैहलकदमी दा मकसद लोकें ते प्रशासन गी अगेत्रें गै सौहगा सर्तक करना ऐ तां जे बेल्लै सिर ऐहतियाती कारवाइयां कीतियां जाई सकन। केन्द्रीय मंत्री होंरें इब्बी गलाया जे भारतीय मौसम विभाग दा इक इलाकाई केन्द्र जम्मू च खडेरया जाग जेड़ा टकोहदे तौरा पर इस्सै खिते लेई अपनियां सेवां देग।

<><><><><><>

Drones Sighted

पुंछ जिले च कब्जा रेखा दे नेड़े आहले अगेत्रे इलाकें च तकरीबन अद्दा दर्जन पाकिस्तानी ड्रोन दिक्खने जाने दे बाद सुरक्षाबलें उत्थे अज्ज इक बड़डा तपाशी अभियान चलाया ऐ।

आकाशवाणी दे जम्मू संवाददाता दी रिपोर्ट मूजब,जंदी रातीं जिले दे मेंढर सैक्टर च गुरसाईं नाला, लंगोट ते बालाकोट इलाकें च एह ड्रोन दिक्खे गे। मन्नेआ जा'रदा ऐ जे एह ड्रोन, किश चिरै लेई भारती इलाके च डुआरी भरने मगरा बन्ने पार वापस चली गे। अज्ज बड्डलै लोस हुं'दे गे सुरक्षाबलें पूरी इलाके दी घेराबंदी करियेँ उथे तपाशी अभियान रम्भी दिता तांजे इस गल्लै दा पता लाया जाई सकै जे इ'नें ड्रोनें दे राहें कुतै कोई थेह'ार जां नशीले पदार्थ ते इस बक्खी नेई सुट्टे गे।

<><><><><><>

Rana –Flood Preparedness

जल शक्ति मंत्री जावेद अहमद राणा होरें कल चला रदे बरसांती आहले मौसम दे मददेनजर Chief Engineers ते होरनें दुएं वरिष्ठ अधिकारियेँ कन्ने इक बैठक दौरान जम्मू-कश्मीर च हाड़े दे प्रबंधन सरबन्धी तयारियेँ दा जायजा लैता। उनें कुसै बी आपदा आहली स्थिति कन्ने निबड्ने, खास करी ओह इलाकें जित्थे हाड़े दी संभावना मती ऐ, उथुआं दी तयारियेँ ते ढांचागत जरूरतेँ दा जायजा लैता। मंत्री होरें जल स्रोतेँ ते दरेयाएं च पानी पर 24 घेंटे निगरानी रक्खने लेई गलाया। सारे मुतलका मैहकमे गी आक्खेया जे ओह आपूंचे तालमेल बनाइयै कम्म करन।

<><><><><><>

Dharmari Restrictions

लोकेँ दी सुरक्षा गी ध्याना च रक्खदे होई जिला प्रशासन रियासी नै सब-डिविजन धरमाड़ी च सब्भनें सिडकेँ पर सारी निजी ते सार्वजनिक गड्डियेँ दी आओ-जाई पर रातीं दे बेल्ले पूरी

चाली बंदिश लाई दिती गेदी ऐ। ए हुकम हर रोज रातीं 8 बजे कोला लेइयै बड्डलै 6 बजे तोड़ी अमल च रौहग ते इस दौरान मुख करी ध्यान रियासी-अरनास-महौर सिड़कै पर दिता जाग। लोकें गी सलाह दिती गई ऐ जे ओ इन्हें बंदिशें दा सख्ती कन्नै पालन करन ते इस सरबंधे च सिविल ते पुलिस प्रशासन दा सहयोग करन।

<><><><><><>

Exam Cancelled

जम्मू-कश्मीर सर्विस सलैक्शन बोर्ड - जेकेएसएसबी नै बिजली विकास विभाग च जूनियर इंजीनियर (इलैक्ट्रिकल) दिएं असामिं लेई जंदे रोज लैता गेदा ओ.एम.आर. आहला लिखित म्तेहान रद्द करी दिता ऐ। जेकेएसएसबी दे कन्ट्रोलर ऑफ एग्जैमिनेशन आसेआ जारी हुकमै मूजब, एह म्तेहान कल कुल 35 केन्द्रें पर लैता जाना हा जिंदे चा 34 केन्द्रें पर एह म्तेहान लेई लैता गेआ पर इक केन्द्र ऐसा बी ऐ हा जित्थे मौसम सरबंधी खराब सूरते हाल करी एह म्तेहान नेई लैता जाई सकेआ। एहदे मगरा बोर्ड नै कल 24 अगस्त गी लैते गेदे इस म्तेहान गी रद्द करने ते नमीं तरीक दा ऐलान मगरा करने दा ऐलान कीता।

<><><><><><>

Wushu Trials

श्रीनगर दे शोरे-कश्मीर इंडोर काम्पलैक्स च एशियाई खेड्डें गितै वुशु खडारियें दी ताल आले त्रंऊ दिनें दे ट्रायल कल सम्पन्न होई गे। तकरीबन 2 सौ खडारी एहदे सांडा मुकाबलें च हिस्सा लैगंन। हर इक भार वर्ग च 7-7 खडारियें गी अगले चरण लेई चुनेया गया ऐ। ध्यानजोग ऐ जे जम्मू-कश्मीर थवां 12 खडारियें एदे च अपनी थाहर पक्की कीती ऐ। सरबंधित अधिकारियें इन्हें

एथलिटें दी सराहना करदे होई ए विश्वास बी जताया ऐ जे भारत पक्क गै एशियाई खेड्डें च बड़ा शानदार प्रदर्शन करोग। वुशु एसोसिएशन नै इस कार्यक्रम दी कामयाब मेजबानी लेई जम्मू-कश्मीर खेड्ड काउंसल दा धन्नवाद कीता ऐ।

<><><><><><>

Weather

मौसम विभाग नै कल्लै तगर जम्मू, रियासी, उधमपुर, साम्बा, कुठआ ते राजौरी च हल्की थमां दर्मेयानी दर्जे दी बरखा पौने दी पेशगोई कीती ऐ। इस्सै दौरान दर्मेयाने दर्जे थवां मती भारी बरखा पुंछ, रामबन, डोडा, किशतवाड़ ते कश्मीर खिते दी किश थाहरें पर होई सकदी ऐ। प्रशासन नै लोकें गी सौहगा ते सतर्क रौहने ते ऐहतियाती उपा करने दी सलाह जारी कीती ऐ। लोकें गी हाडें दी शैंका आहले इलाकें ते हेठले मैदानी इलाकें च मती सतर्कता बरतने लेई आक्खेया गया ऐ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना

चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>